



## 照顧妻兒我本分

有人話做人父母難，我話俾你地聽，做智障人士嘅父母仲難。

我太太係一名中度智障人士，我地個仔係 1982 年出世，亦都係有智障。我除咗要照顧唔能夠自理、身體虛弱嘅老婆，仲要父兼母職，照顧一出世就已經好多病痛嘅仔。佢出世之後就要喇氧氣箱，靠機器維持生命。到咗 3 歲，都只係得 8、9 磅，喺醫院住咗兩、三年。後來經醫生轉介去政府嘅耳鼻喉科，食藥後先有少少好轉，可以食到嘢，不過病情仍然好反覆。

除咗健康，我仲要時常擔心個仔嘅安全。始終一個人嘅能力有限，我又要顧住屋企個老婆，因此，我會俾個仔幫手做啲簡單嘅嘢，好似落樓下買飯盒，但如果要搭地鐵或者火車嘅話，我就一定要帶住佢，以前返學、放學，都係由我親自接送。眨吓眼，而家個仔已經 20 幾歲，喺庇護工場工作。

諗番轉頭，個仔出世嗰陣，當時嘅主診醫生都覺得佢嘅生存機會好渺茫，勸我不如放棄；之後佢又經歷過好多次生命危險，但我始終都無放棄過。咁多年嚟，要照顧佢兩母子都有壓力㗎，不過我係佢地嘅丈夫同阿爸，照顧佢地係我應盡嘅責任，我從來無逃避過，亦都無怨天尤人。

我嘅願望好簡單，就係希望社會大眾唔好對智障人士投以太多奇異或者厭惡嘅目光，佢地雖然係智障，但可以感受到唔友善嘅對待。如果呢個社會能夠對智障人士多一啲包容、多一啲尊重，相信佢地嘅生命一定會更加美麗，而佢地嘅家人都有多一啲安慰。

(548 字)